

Karatas Pawre kot Karatas kamã Jejus kôt hkwÿjê hwÿr kagà nê mēnh

Pawre na pre kagàja nhîpêx nê pika pê Karatas kamã Kris kwÿjê hwÿr kumê. Na pre ra Ijaew kwÿjaja mē hwÿr mra nê Tirtûm kapêr kwÿm ri mē ahkre ho pa nê mē kãm:

—Kot kaj mē amnhî kaxyw Jejus Kris kôt ajamaxpêr hãmri nê mãanên mē ixpê Ijaew nhîgêt kot amnhî nhîpêx kôt amnhî nhîpêx. Kê Tirtûm ja hã mē apumu nê mē ato hkra. Anê.

Nom ã mē kapêr anhÿrja kot anhÿr kêt. Mē pahte amnhî kaxyw Jejus Kris kôt pajamaxpêr nê hkôt amnhî xunhwÿr pix ã mē pahpumunh kôt na hte Tirtûm mē pahto hkra. Tã nhũm prem ã mē kãm ho hêx anhÿr o pa nhũm Pawre tee ri ã mē kapêr anhÿrja ã mē harênh ma nhũm ja kêp omnuj nê. Jakamã nhũm Karatas nhõ xwÿnhjê mã kagàja nhîpêx nê mē hwÿr kumê. Nê kamã hprî hã Tirtûm kot mē ho hkra kaxyw tanhmã amnhî nhîpêx to hã mē kãm harê nê hã kagà. Nê mē kãm:

¹⁻² Pa Karatas nhõ xwÿnhjaja? Xà mē amex? Ixpê Pawre na pa mē awÿr ixpêr mē nê mēmoj tã mē amã karõ.

Mêpahpãm Tirtûm mē Jejus Kris na pre wa mē akaxyw ixãm. Ixte wa ÿ hã ma ri mē akôt mē ajahkre o ri ixpa kaxyw. Na pre Jejus ty nhũm Tirtûm akupÿm ho htîr. Hãmri nhũm wa mē akaxyw ixãm. Pyka ja kamã na pre mēhõ mē akaxyw ixãm kêt nê. Tirtûm mē Jejus Kris na pre

wa ixãm. Jakamã na pa ã mẽ awÿr kagà nhĩpêx nẽ mẽn̄h anẽ. Mẽ apê Tĩrtũm krajê hwÿr.

Nẽ ota jar krĩ ja kamã ixpyrà nẽ Kris kôt mẽ pahkwÿjaja mẽ awÿr hpêr mẽ.

³ E kê Mẽpahpãm Tĩrtũm mẽ Pahihtĩ Jejus Kris wa mẽmoj to mẽ akutã nojarêr rãhã ho pa. Nẽ mẽ ato mex rãhã nẽ. Ka mẽ wa ÿ hã akĩnh nẽ ajamakêtkati nẽ axãmnhĩx ri apa.

⁴ Nà na pre Krisja amnhĩ grõnh kôt mẽ pahwÿr wrÿ nẽ mẽ panê ty. Mẽ pahte amnhĩ tomnuj pãnhã amnhĩrer kaxyw mẽ panê ty. Mẽpahpãm Tĩrtũm kãm hprãm xà hkôt. Tã mẽmo kaxyw na pre ã mẽ panê amnhĩ nhĩpêx anẽ? Nà pika ja kamã mẽ kot amnhĩ nhĩpêxja omnuj tÿx jakamã nhũm amnhĩ grõnh kôt te mẽ kot amnhĩ tomnuj pẽ mẽ papytãr pyràk o mẽ panhĩpêx nẽ ã mẽ panê htyk anẽ. ⁵ Jakamã kwa kêr pu mẽ Tĩrtũm mã mex o mex ã mãn harẽnh o ri papa. Nà kot puj mẽ ã amnhĩ nhĩpêx anhÿr rãhã ho ri papa.

Mẽ ujarẽnh pixi ãm hãmri hã harẽnh

Rõmãn 16.17; Sikũn Korĩt 11.3-4; Epes 4.14; Koro-rosẽ 2.8; Sikũn Pêtre 2.1-3

⁶ Kwa ixkrãmnhwÿjaja. Na pa pre mẽ ate tanhmã amnhĩ nhĩpêx to hã mẽ ajarẽnh ma nẽ ixkaprĩ nẽ tee ri mẽ akukamã ijamaxpêr. Na pre Tĩrtũmja Kris kukwak ri mẽ ato mex nẽ. Nẽ mẽ ate hkôt amnhĩ nhĩpêx o apa hprãm xaj te kot amnhĩ wÿr mẽ awÿr pyràk o mẽ anhĩpêx ka mẽ hkôt amnhĩ xunhwÿ. Tã xep tanhmã mẽ ajamaxpêr to nẽ ra hkaga kaxyw. Ra axtem mẽ ujarẽnh õja ma nẽ gryk ã Tĩrtũm kaga kaxyw. Pa tee ri mẽ ajarẽnh ma nẽ ixkaprĩ nẽ. Kwa mon ka mẽ axtem nẽ ri ã

amnhĩ nhĩpêx anhÿr mã? ⁷ Jejus jarênh pix na ãm hãmri. Mo mẽ ujarênh mex õ kot ka kêt mẽ ama nẽ hkõt amnhĩ nhĩpêx? Nà amrakati kumrêx. ã mẽ amã ujarênh anhÿr xwÿnhjaja na htem Kris kapêr o pihkàr rũnh kumrêx o pa nẽ katàt kõt harênh kêt nẽ. Ka xep mẽ ama nẽ ajamaxpêr kati rũnh nẽ.

⁸ Na pa pre ma mẽ awÿr mõ nẽ ãm hãmri mẽ amã Jejus kot tanhmã mẽ panê amnhĩ nhĩpêx to hã harê ka prem inhma. Tã koja mēhõ mẽ awÿr mõ nẽ mẽ amã nhãm mẽ ujarênh õ jarê nhũm Tĩrtũm ja hã omu nẽ nhÿrmã ma mẽ kot amnhĩ xà htÿx kamã hamak tũm xà hwÿr kumẽ nhũm ma hwÿr mõ nẽ aa kator kêt nẽ. Mẽ pahtõ rÿ Tĩrtũm kapêr o wrÿk xwÿnhjê hõ koja ã amnhĩ nhĩpêx anê nhũm ja hã omu nẽ ma kuwy pẽ himõta wÿr amnhĩ nẽ kumẽ. ⁹ E kot paj axte mẽ amã ja jarê ka mẽ aprĩ hã inhma. Koja mēhõ mẽ awÿr mõ nẽ mẽ ate hkõt amnhĩ xunhwÿr xwÿnhhta kwÿm ri tanhmã mẽ amã ujarênh to. Hã koja Tĩrtũm omu nẽ nhÿrmã ma mẽ kot amnhĩ xà htÿx kamã hamak tũm xà hwÿr kumẽ nhũm ma hwÿr mõ nẽ kamã pa ho pa nẽ aa kator kêt kumrêx.

*Tĩrtũm pix kãm Pawre hkĩnh hprãm ã kot jarênh
Juãw 5.44; Atre 26.9-20; Karatas 2.6*

¹⁰ Nẽ koja mẽmojaja ixkapêr ma nẽ kãm mar prãm kêt o kãm ixkĩnh kêt japêr nẽ mãmrĩ kãm ixkĩnh kêt. Tĩrtũm kãm ixkĩnhja pix na inhmã hprãm. Kop apu mẽ piitã kãm ixkĩnhja mãn inhmã hprãm ronhÿx pa Kris nhÿ hã kapêr jarênh o ri ixpa hkêt nẽ.

Tĩrtũm kot Pawre mã Kra Jejus o amnhĩrĩt ã harẽnh

Sikũn Korĩt 1.12; Wam Tesarõn 2.4

11-12 E Jejus kõt ixkràmnhwỳjaja. Nà ixte mẽ ujarẽnh mex jarẽnh o ixpaja na pre jar pika ja kamã mẽhõ amnhĩ krã hkõt inhmã harẽnh rỳ inhmã ahkre hkêt nẽ. Jejus Kris tãm na pre ixwỳr kato nẽ inhmã ho amnhĩrĩt. Jakamã mex o kot pika jakamã mẽ ujarẽnh piitã hakrenh par. 13-15 E kot paj ixprĩ hã mẽ amã tanhmã amnhĩ jarẽnh to ka mẽ inhma. Tanhmã Tĩrtũm kot amnhĩ kaxyw ixãm to hã pa mẽ amã amnhĩ jarẽ. Nà na pre kormã ixkêt ri ixkukamã hamaxpẽr nẽ amnhĩm ixta nẽ amnhĩ kaxyw ixãm nẽ kot ixto mex ã ixtã amnhĩ jarẽ. Tã pa pre ixkato nẽ gaa nẽ ixàptàr nom kormã Jejus Kris kõt amnhĩ xãm kêt nẽ. Na pa pre axtem nẽ inhmã mẽ ixpê Ijaew kot amnhĩ nhĩpêx kõt pix mã amnhĩ nhĩpêx o ri ixpa hprãm nẽ. Nhũm pre ixpyrà nẽ arĩ mẽ nywjaja haxwỳja kãm mẽ hkõt pix mã ri amnhĩ nhĩpêx o pa hprãm nẽ. No inhmã mẽ hkõt amnhĩ nhĩpêx mex o mẽ hakrenh par prãm jakamã na pa pre mẽ inhĩgêt kõt amnhĩ nhĩpêx mex kumrẽx o ri ixpa. Mẽ kapẽr piitãã hkõt amnhĩ nhĩpêx mex nẽ. Tã ã amnhĩ nhĩpêx anhỹr o ixpa kaprỳ. Na pa pre axtem nẽ mẽ kot Tĩrtũm Kra Jejus Kris kõt amnhĩ xunhwỳr xwỳnhjê nhĩpêx kati ho ri mẽ hkõt ixpa nẽ inhmã mẽ himex prãm tỳx kumrẽx. ã na pa pre amnhĩ nhĩpêx anhỹr o ri ixpa. Ra mẽ ate ja hã ixpumunh mex.

16-17 Tã pa pre ma Tamas wỳr mỗ. Kamã tanhmã Kris kwỳjê nhĩpêx to kaxyw ma mẽ hwỳr mỗ. Hãmri nẽ kormã mẽ hwỳr ixàhtêp o inhmõr mẽ nhũm Tĩrtũm tanhmã ixto nẽ inhmã Kra Jejus o

amnhĩrīt pa jatã omu. Kêp Tĩrtũm Kra hã pa ixprĩ hã omu. Nhũm inhmã kapêr nê ixte kãm tanhmã amnhĩ nhĩpêx to ho ri ixpa kaxyw ixapênh ã inhmã karõ nê Ijaew kêt xwýnhjê hwýr inhmê. Ixkwý Ijaew wýr inhmênh kêt nê. Na pre inhmã:

—E kêr ka ma Ijaew kêt xwýnhjê hkôt ri mẽ kãm ixkapêr jarênh o ri apa.

Anhýr jakamã pa pre kuma nê hkôt amnhĩ xãm kurê kumrêx nê ã amnhĩ nhĩpêx anhýr o ri ixpa. Jao tanhmã ixte kêp hkwyjê nhĩpêx tota kaga nê ma pyka pê Arap wýr mō. Nom tanhmã amnhĩ tã Jejus kwýjê kukjêr to hkêt nê. Nê Jerujarê hwýr inhmōr nê Jejus nhỹ hã mẽ ahkre xwýnh maati jaja tanhmã amnhĩ tã mẽ kukjêr to hkêt nê. Ām Tĩrtũm kot inhmã hã karõ xà hkôt ma Arap wýr mō nê kamã kapôt ã ri ixpa. Kamã na pre Tĩrtũmja inhmã Jejus Kris kot tanhmã amnhĩ nhĩpêx to ho amnhĩrīt o pa. Hãmri nê inhmã kapêr pa amnhĩ tã kuma hãmri nê ma akupým Tamas wýr mō.

¹⁸ Tã nhũm ra amgrà axkrunêpxi nê hapêx pa Tamas rũm ixkato nê ma Jerujarê hwýr Simãw Pêtre hwýr mō. Hãmri nê kuri pōj nê hkôt ixpikamênh ã ixtã semãn axkrut. ¹⁹ Nom mẽ kot Jejus nhỹ hã hkwyjê jahkre ho mẽ pa xwýnh maati hkwyjê hō pumunh kêt kumrêx. Ām Simãw Pêtre mẽ Pahihti Jejus tō Xiakreja pix wa omu. ²⁰ Ām hãmri na pa ã amnhĩ jarênh anê. Tĩrtũm kot ja hã ixpumunh mex. ²¹ Tã pa pre mẽ kurũm ixkato nê hpãnhã ma pika hkwyjê hkôt ijapôx o mẽ hkôt ixpa. Ma pika pê Sír mẽ Sírĩa wa hwýr mō.

Mẽ kot amnhĩ jaêr pê Pawre kot amnhĩ nhĩpêx nyw ã omunh ã mẽ harênh

22 Nom Jutej kamã Kris kwỳjaja na prem kormã ixpumunh kêt nẽ. ãm Simãw Pẽtre mẽ Xiakre pix na pre wa ixpumu. 23 Na pre ra mẽ hkwỳjaja tanhmã hkwỳjê kot axpẽn mã ijarẽnh toja ma. Na prem ijarẽnh o:

—Kwa Jejus ã mẽ panhĩpêx kati htỳx o pa xwỳnhta na pre tanhmã hamaxpêr to nẽ hpãnhã mẽ kãm Jejus kapêr jarẽnh o ri mẽ hkôt pa. Mẽ kot amnhĩ kaxyw hkôt hamaxpêr kaxyw. Ra kot Jejus nẽ mẽ pahkurê htã hpãnhã mẽ kãm kapêr jarẽnh o ri mẽ hkôt pa. Anẽ.

24 Hãmri nhũm Kris kwỳjaja amnhĩ jaêr pê ijarẽnh ma nẽ inhỹ hã hkĩnh nẽ. Nẽ ixtã Tĩrtũm mã mex o mex ã harẽ.

2

Pawre kot Kris kwỳ hkrãhtũmjê mã amnhĩ jarẽnh Atre 15.1-11

1-2 Tã nhũm amgrà pê 14 nẽ hapêx nhũm Tĩrtũm akupỹm Jerujarẽ hwỳr inhmẽ pa ma akupỹm mỗ. Panãpe nẽ Xitre mẽ pa mẽ mỗ nẽ mẽ hwỳr pøj. Hãmri nẽ Kris kwỳ hkrãhtũmjê hwỳr mra nẽ mẽ kãm amnhĩ jarẽ. Mẽ tapxipixjê mã amnhĩ jarẽ nẽ ixte Ijaew kêt xwỳnhjê mã Jejus kapêr jarẽnh o ixpa hã amnhĩ jarẽ. Na pa pre ra amnhĩ kukamã ijamaxpêr o:

—Koonẽn. Kot pa apu mẽ kãm amnhĩ jarẽ nhũm mẽ inhma nẽ ixte Tĩrtũm kapêr kwỳm ri mẽ ahkre ho ixpa hã ixkamnhĩx rỳ hã inhmã akir. Na pa hte Ijaew kêt xwỳnhjê mã Kris jarẽnh o ixpa no ãm mẽ ixpê Ijaew pyrà nẽ finat Mojes kapêr kôt mẽ kot amnhĩ my kwỳt kà jakàr ã mẽ kãm karõ hkêt nẽ. ãm mẽ kot Kris kôt amnhĩ xunhwỳr pix

kaxyw na pa hte mẽ kãm hã karõ ho ixpa. Tã kot paj Kris kôt mẽ ixkrãhtũmjê mã ja hã amnhĩ jarẽ nhũm mẽ inhma nẽ tanhmã hamaxpêr to nhũm ja mẽ kêp omnuj japêr nhũm mẽ tanhmã amnhĩ to nẽ ixte Kris kapêr jarênh o ixpaja nẽ ixkurê. Jakamã nhũm ra ixte mẽ kãm Kris kapêr jarênh o ixpa nhũm mẽ kot inhmar xwýnhjaja ijarênh ma nẽ tee amnhĩ kukamã hamaxpêr o ra hkaprĩ nẽ pa.

Anhỹr o ijamaxpêr. ³ Tã na prem ixte amnhĩ jarênhjaja ma nẽ ja nẽ tanhmã inhmã nẽ hkêt nẽ. Pa mẽ kãm amnhĩ jarênh pa nhũm mẽ inhma nhũm Ijaew kêt xwýnhjaja kot amnhĩ jakàr kêtja nhũm mẽ kãm mex nẽ. Mẽ kêp tanhmã kute hkêt nẽ. Nhũm Ijaew kêt xwýnh Xitre ixkôt pa nhũm mẽ kot omunh tã kot mẽ ixpyrà nẽ amnhĩ my kwryt kà krãhyr ã kãm karõ hkêt nẽ.

⁴ Tã nhũm mẽ kêp Jejus kwý hã amnhĩ jarênh o hêx xwýnhjaja mẽ ixtã akuprõ. Nom hêx rom mẽ ixte Kris kôt amnhĩ nhĩpêx ã mẽ ixpumunh pix kaxyw. Hãmri nẽ ixkapêr ma nẽ Xitre hã inhmã akir nẽ inhmã:

—Kwa na pre Xitre Jejus kôt pix mã amnhĩ xãm nom finat Mojes kot mẽ pahpê Ijaew kot amnhĩ nhĩpêx ã karõ hkôt amnhĩ nhĩpêx kêt nẽ. Kwa ja mex kêt. Na htem Jejus kôt amnhĩ xunhwý nẽ mãänën finat Mojes kapêr kôt amnhĩ nhĩpêx. Jakamã kwa kãm anẽ kê amnhĩ my kwryt kà krãhta. Finat Mojes kot mẽ panhĩgêjtê mã hã karõ xà hkôt.

⁵ Anhỹr tã pa prem mẽ kuma nẽ ãm mẽ kuma. Kot pa ri mẽ kãm ja hã karõ hkêt nẽ. ãm Jejus kapêr kôt pix mã kot puj mẽ amnhĩ nhĩpêx o papa nẽ finat Mojes kapêr mẽ Jejus kapêr o papihkàr kêt nẽ.

Kot puj mẽ anhÿr o Jejus kapër o ahkà nhũm ja mex kêt nẽ. Jejus kapër kãm mo mẽ kot mẽmy kwryt kà jakàr ã mẽ kãm karõ? Amrakati. Jakamã na pa pre ãm mẽ pano kupyr o mẽ pa xwÿnh tajê kapër ma nẽ ãm mẽ kuma.

⁶ Tã pa pre ra Ijaew kwÿ pẽ Jejus kôt ixkwÿ hkrãhtũmjẽ mã amnhĩ jarẽnh pa. Tanhmã ixte Ijaew kêt xwÿnhjẽ mã Jejus kapër jarẽnh to hã mẽ kãm amnhĩ jarẽ nhũm mẽ inhma nhũm ja mẽ kãm mex nẽ. Jakamã Ijaew kêt xwÿnhjaja kot mẽ ixpẽ Ijaew pyrã nẽ finat Mojes kapër kôt amnhĩ nhĩpêxja nhũm mẽ tanhmã mẽ kaxyw inhmã hã karõ hto hkêt nẽ. Tĩrtũm na hte mẽ kêp mẽ hkrãhtũm ã mẽ omunh xà hkôt mẽ hkwyjẽ rom tanhmã mẽ ho mex to hkêt nẽ. Na hte mẽ pahpiitã mẽ panhĩpêx o axpẽn pyrãk. Jakamã na pa hte ijaxwÿja Jejus kôt mẽ ixkrãhtũmjaja kot amnhĩ to rax o ijakrenh ã tanhmã ijamaxpër to hkêt nẽ. ⁷ Na pa pre mẽ kãm amnhĩ jarẽnh pa nhũm mẽ inhma nẽ axpẽn mã:

—Nà ãm hãmri na pre Tĩrtũm ahpÿnhã Pawre mẽ Simãw Pêtre wa kãm wa àpênh ã karõ nẽ Ijaewjẽ hwÿr Simãw Pêtre mẽ nẽ axtem Ijaew kêt xwÿnhjẽ hwÿr Pawre mẽ. Wa kot ahpÿnhã mẽ hkôt mẽ kãm Jejus kapër jarẽnh o ri pa kaxyw. Nà ãm hãmri na hte wa ã amnhĩ nhĩpêx anhÿr o pa. Nà ja mex. Anẽ.

⁸ Ra Tĩrtũm kot Ijaew wÿr Simãw Pêtre mẽnh tã hpãnhã Ijaew kêt xwÿnhjẽ kaxyw pa ixãm. ÿ hã wa ixte mẽ kãm Jejus kapër jarẽnh o ri mẽ hkôt wa ixpa kaxyw. ⁹ Jakamã nhũm mẽ ixkrãhtũm Xiakre mẽ Simãw Pêtre mẽ Juãwja ixte mẽ kãm amnhĩ jarẽnh ma nẽ hkĩnh nẽ. Tĩrtũm kot ixto mex nẽ Ijaew kêt xwÿnhjẽ hwÿr inhmẽnh ã ixte amnhĩ

jarēnhja ma nē hkĩnh nē. Hāmri nē Panāpe mē wa inhmā kapēr nē wa inhmā:

—Nà âm hāmri. Kot puj xep mē anē. Ka mē Panāpe wa kot kaj wa ma Ijaew kêt xwỳnhjê hkôt mē kām Jejus kapēr jarēnh o ri apa. No mē pajaja kot paj mē axtem mē pahkwỳ Ijaew kôt harēnh o ri ixpa. Ā kot puj mē ahpỳnhā mē hwỳr papa anē. ¹⁰ Nom kêr ka wa inhmar kumrêx. Kêr ka wa mē ixpyrà nē Kris kôt mē pahkwỳjê pê amrakati xwỳnhjê ho mex o ri apa. Měmoj to mē kutā anojarêt rāhā ho ri apa.

Anhỹr o wa inhmā kapēr pa wa mē kuma nē mē kām:

—Tôe. Nà kot paj wa anē. Ra ā wa ixte amnhĩ nhĩpêx anhỹr kaxyw kênā. Anē.

*Pawre kot Simāw Pêtre mā àkjêr ā harēnh
Atre 10; Rômān 3.21-31, 6.1-14*

¹¹⁻¹⁴ Tā nhũm Simāw Pêtreja man mē ixwỳr krĩ pê āxiok wỳr mō. Nē jar mē ixkôt ri pa. Ixpyrà nē kêp Ijaew tā Kris kôt Ijaew kêt xwỳnhjê hkôt pa nē mē kutā apkur o pa. Ixpyrà nē àmnhĩx ri mē kutā apkur o ri mē hkôt pa. Ijaew kêt xwỳnhjaja kot amnhĩ my kwryt kà jakàr kêt jakamā na pa htem mē kutā ixàpkur kêt nē. Tā ra mē ixte Kris kôt amnhĩ xunhwỳr jakamā ja mē ixpê tanhmā kute hkêt. Na pa htem ixàmnhĩx mē hkôt ixpa nē mē kutā apku. Ra mē ixte Kris kôt amnhĩ xunhwỳr kênā kot pa hkêt ri mē hkôt ixpa hkêt. Na pa htem ixàmnhĩx mē hkôt tanhmā amnhĩ nhĩpêx to ho ri ixpa.

Tā nhũm Xiakre kot mē ixwỳr mē rēnh xwỳnhjaja haxwỳja mē ixwỳr mō. Mē ixpyrà nē mē kêp Ijaew

tã mẽ ixpyrà nẽ Kris kôt amnhĩ xunhwỳ. Jakamã ra mõi nẽ mẽ ixwỳr pøj. Hãmri nhũm Simãw Pêtre mẽ omu nẽ mẽ umaj axte Ijaew kêt xwỳnhjê kutã apkur kêt nẽ. Axtem nẽ õja py nẽ o tẽ nẽ mẽ hkàx ã ahte apkur o nhỹ. Hãmri nhũm ra mẽ ixri Ijaew kwỳ pẽ Kris kôt mẽ pahkwỳjaja ja hã omu nẽ piitã uràk nẽ ã amnhĩ nhĩpêx anẽ nẽ Simãw Pêtre ri Ijaew kêt xwỳnhjê hkàx ã apkur o hkrĩ. Nhũm ixkôt pa xwỳnh Panãpeja haxwỳja ja hã mẽ omu nẽ mẽ uràk nẽ ã amnhĩ nhĩpêx anẽ nẽ mẽ hkàx ã apku. Hãmri pa tee ri ja hã mẽ omu nhũm ja inhmã mex kêt nẽ. Na prem ã amnhĩ nhĩpêx anhỹr o Tĩrtũm kapêr ã kagã htũm kamã mẽ ujarẽnh mex kwỳm ri amnhĩ nhĩpêx. Jakamã pa ã mẽ kot amnhĩ nhĩpêx anhỹrja nẽ Simãw Pêtre mã ixkapêr. Mẽ piitã mẽ noo mã xa nẽ ã kot amnhĩ nhĩpêx anhỹrja nẽ kãm ixkapêr nẽ kãm:

—Tk. Kwa nà Simãw Pêtre. Ri ã amnhĩ nhĩpêx anhỹr kêt nẽ. Pahpê Ijaew tã kormã pahkwỳjaja hpôx kêt ri ka hte ixpyrà nẽ axãmnhĩx Ijaew kêt xwỳnhjê kutã axàpkur o ri apa. Tã amnhĩ wỳr mẽ pahkwỳjê pumu nẽ axtem nẽ mẽ hkàx ã axàpkur o akrĩ. Kwa nà na ka ã amnhĩ nhĩpêx anẽ nẽ ra axtem amnhĩ nhĩpêx. Te ate mẽ kãm akapêr nẽ mẽ kãm: “Kot kaj mẽ ixpyrà nẽ amnhĩ my kwỳt kà jakà pa rĩ mẽ akôt ri ixpa nẽ mẽ akutã ixàpkur o ixpa.” Anhỹr pyràk. Kwa ja mex kêt.

¹⁵ —Mẽ pahpê Ijaew na pu htem mẽ kêp Ijaew kêt xwỳnhjê jarẽnh o: “Mẽ kot mẽ pahte amnhĩ nhĩpêx kôt amnhĩ nhĩpêx kêt xwỳnhjaja.” Anẽ. ¹⁶ Tã mẽ pahpê Ijaew tã na hte Tĩrtũmja mẽ pahte mẽ panhĩgêt kot amnhĩ nhĩpêx kôt mẽ pahte amnhĩ nhĩpêx ã mẽ pahpumunh kôt mẽ pahto hkra hkêt

ně. Ra mẽ pahte ja pumunh mex. ãm mẽ pahte amnhĩ kaxyw Jejus Kris kôt pajamaxpěr ã mẽ pahpumunh kôt pix mã na hte mẽ pahto hkra. Kot pu mẽ amnhĩ kaxyw hkôt pajamaxpěr nhũm ja hã mẽ pahpumunh kôt pix mã mẽ pahto hkra.

¹⁷ —Mẽ pahpê Kris kwỳ jakamã na hte Tĩrtũm amnhĩm mẽ pamex ã mẽ pajarẽ nẽ mẽ pahte amnhĩ tomnuj xwỳnh kêt ã mẽ pajarẽ. Jakamã na pu htem paxãmnhĩx ri Ijaew kêt xwỳnhjê kot Kris kôt amnhĩ xunhwỳr xwỳnhjê hkôt ri papa ho papa. Ra Tĩrtũm kot mẽ pahpyrà nẽ amnhĩm mẽ mex ã mẽ harẽnh kênã. Tã koja mẽhõ kormã ja mar kêt nẽ tanhmã hã mẽ pajarẽnh to nẽ mẽ pajarẽnh o: “Tk. Ra mẽ kot amnhĩ kaxyw Kris kôt hamaxpěr tã axtem nẽ Ijaew kêt xwỳnhjê hkôt ri pa. Jakamã arĩ mẽ kot amnhĩ tomnuj xwỳnh kênã.” Anhỳr o mẽ pajarẽnh japêr. Nom ãm mẽ pahte amnhĩ tomnuj xwỳnh ã mẽ pajarẽnh kaprỳ. Na pu htem Kris kôt amnhĩ nhĩpêx nẽ ra tãm amnhĩ nhĩpêx mex o papa. ¹⁸ No kot pu mẽ hkôt ri amnhĩ nhĩpêx o papa htã tanhmã pajamaxpěr to nẽ pahte amnhĩ nhĩpêx tũm o awjanã hãmri nẽ amnhĩ tomnuj tỳx kumrêx.

¹⁹ —Tã tanhmã kot puj wem amnhĩ to nẽ mẽ panhĩgêt kot amnhĩ nhĩpêx piitã hkôt amnhĩ nhĩpêx mex o ri papa? Na pu htem pajamaxpěr o: “Kot paj ã amnhĩ nhĩpêx anẽ nẽ ã amnhĩ nhĩpêx anẽ nhũm Tĩrtũm ja hã ixpumu nẽ amnhĩm inhmex ã ijarẽ.” Anhỳr o pajamaxpěr. Hãmri nẽ finat Mojes kot mẽ panhĩgêttjê mã kapêr piitã hkôt ri mnhĩ nhĩpêx o papa nom tũhã hkwỹm ri tanhmã amnhĩ tomnuj to. Jakamã nhũm Tĩrtũm ja hã mẽ pahpumunh kôt mẽ pamex ã mẽ pajarẽnh kêt nẽ. Kapêr ã kagà htũm kot ã ja jarẽnh kot

anhÿr. Nom kot puj mẽ amnhĩ kaxyw Kris kôt pajamexpêr nhũm ja hã mẽ pahpumunh kôt amnhĩm mẽ pamex ã mẽ pajarê. Hãmri pu mẽ Tĩrtũm kôt amnhĩ nhĩpêx o ri papa nê axte mẽ pahpê Ijaew nhĩgêjtê kot amnhĩ nhĩpêx kôt amnhĩ nhĩpêx hkêt nê. Te ra mẽ pahtyk nê axte hkôt amnhĩ nhĩpêx kêt pyrà nê pãnhã Tĩrtũm kapêr kôt pix mã ri amnhĩ nhĩpêx o ri papa.

20 —Nê na prem pĩ kahpa hã Kris nhô nê kupĩ nhũm mẽ pahte amnhĩ tomnuj te ãhkô hã jêt nê haxwÿja htyk pyràk. Jakamã na pu htem amnhĩ tomnuj kaga nê Kris kôt amnhĩ xunhwÿ nhũm Karô mẽ pahkarôm agjê pu mẽ te Jejus Kris kot amnhĩ nhĩpêx pyràk o amnhĩ nhĩpêx o papa. Jao hpãnhã mẽ pahte amnhĩ nhĩpêx nyw pix o amnhĩ nhĩpêx o ri papa. Kris kãm hprãm xà hkôt pix mã tanhmã ri amnhĩ nhĩpêx to ho papa. Kris kêp Tĩrtũm Kra htã kãm mẽ pajapê kamã mẽ panê htyk jakamã na pu htem amnhĩ kaxyw kôt pix mã pajamexpêr rãhã ho papa.

21 —Ãm hãmri na pre Tĩrtũm mẽ pahto mex kumrêx nê mẽ pahwÿr Krisja mẽ nhũm mẽ pahwÿr wrÿ nê mẽ panê ty. Tã na pa pre kapêrja ma nê mar tÿx nê hã ri ixpa nê ho ijamakêtkati hkêt nê. Tã kop apu Tĩrtũm kot mẽ pahte mẽ panhĩgêjtê kot amnhĩ nhĩpêx o amnhĩ nhĩpêx ã mẽ pahpumunh kôt mẽ pamex ã mẽ pajarênh ronhÿx pre Krisja ãm mẽ panê htyk kaprÿ. Mo kaxyw nhÿx pre mẽ panê ty? Anê.

Ã na pa Simãw Pêtre mã ixkapêr anê nhũm mẽ piitã apkur pê hã inhmar o hkrĩ.

3

*Mē pahte amnhĩ krā hkôt pahpê Tĩrtũm kra hkêt
ã mē pajarēnh*

*Karatas 5.16-23; Epes 2.8; Piripos 3.9; Sikũn
Ximotre 1.9; Xitre 3.4-7*

¹ Kwa Karatas nhõ xwỳnhjaja. Te ri mē ajamaxpēr kêt kumrēx pyrāk. Amnepê mã mē awỳr inhmõrta ã na pa pre mē amã tanhmã Kris htykja jarēnh to. Pĩ kahpa hã mē panê htyk ã harē ka mē aprĩ hã inhma. Tã nhũm Tĩrtũm kapēr jarēnh o mē hêx xwỳnhjaja ixpãnhã mē awỳr mra nē tanhmã mē amã ujarēnh to ka mē ama nē mē ajamaxpēr o apihkār rax nē. Jao axte Kris tyk mã ajamaxpēr kêt nē. ² E mē inhmã mēmoj jarē. Mēmoj tã mē apumunh kôt na pre Tĩrtũm mē awỳr amnhĩ Karõ rē nhũm mē awỳr agjê? Xà mē anhĩgêt kot amnhĩ nhĩpêx kôt mē ate amnhĩ nhĩpêx ã mē apumunh kôt? Nà na pre ja hã mē apumunh kôt mē awỳr rēnh kêt nē. Na ka prem Kris jarēnh ma nē amnhĩ kaxyw hkôt ajamaxpēr nhũm ja hã mē apumunh kôt mē awỳr kurē nhũm mē awỳr agjê.

³ Na pu htem amnhĩ krā hkôt tanhmã amnhĩ nhĩpêx to ho pahpê Tĩrtũm kra hkêt nē. Tĩrtũm Karõ pix kukwak ri na pu htem pahpê hkra. Tã ka mē axtem nē ajamaxpēr o:

—Nà Tĩrtũm ra kot ixto hkra jakamã kot paj arĩ ri mē inhĩgêt kot amnhĩ nhĩpêx kôt amnhĩ nhĩpêx o ixpa rãhã nē inhmex kumrēx nē ri ixpa. Anē.

Kwa ã mē ajamaxpēr anhỳrja mex kêt. ⁴ Mē akwỳ kot Kris ã mē atomnuj tã ka mē amnhĩ xà htỳx kamã ajamak o ri apa htã Kris kaga hkêt nē. Tã ra axtem nē mē kapēr o mē hêx xwỳnhjê

jamaxpēr kôt ajamaxpēr o te Kris ã amnhĩ xà kamã ajamak kaprý pyræk. Kwa nà mẽ ri mẽ hkôt ajamaxpēr kêt nẽ. ⁵ Na pre Tĩrtũm mẽ awýr amnhĩ Karõ rê nhũm mẽ awýr agjê nẽ mẽ amã aa mẽ ate mẽmoj pumunh kêt kwý ho anhýr o ri mẽ akamã pa ho pa. Xà mẽ anhĩgêt kot amnhĩ nhĩpêx kôt mẽ ate amnhĩ nhĩpêx ã mẽ apumunh kôt na pre ã mẽ amã amnhĩ nhĩpêx anẽ? Nà ja kôt kêt. ãm mẽ ate Kris kapēr mar nẽ amnhĩ kaxyw hkôt ajamaxpēr ã mẽ apumunh kôt pix mã na pre ã mẽ amã amnhĩ nhĩpêx anẽ.

Tĩrtũm kot amnhĩ tã finat Apraãw pumunh kôt mex ã harênh

Rômãn 4.1-25; Xiakre 2.23

⁶ Nẽ mẽ ixpê Ijaew pàr krax finat Apraãw na pre amnhĩ kaxyw Tĩrtũm kôt hamaxpēr nhũm amnhĩ tã omu nẽ kãm:

Nà ate amnhĩ kaxyw inhmã ajamaxpēr tỳx jakamã na pa amnhĩm amex ã ajarẽ. Amex kumrêx Apraãw.

⁷ Anhýr o kãm kapēr jakamã mẽ pahte uræk nẽ amnhĩ kaxyw hkôt pajamaxpēr xwýnhjaja te mẽ pahpê Apraãw tãmnhwý pyræk. ⁸ Nẽ mẽ apê Ijaew kêt xwýnhjaja. Na hte Tĩrtũm mẽ pahto hpimræk tã mẽ pahte amnhĩ kaxyw kãm pajamaxpēr ã mẽ pahpumunh kôt amnhĩm mẽ pamex ã mẽ pajarẽ nẽ mẽ pahto hkra. Amnepêm na pre Apraãw mã kapēr nẽ kãm:

E ate amnhĩ kaxyw ixkôt ajamaxpēr jakamã kot paj akukwak ri pyka piitã hkôt mẽ piitã mẽ ho mex nẽ.

Anhýr o kãm kapēr jao mããnên mẽ apê Ijaew kêt xwýnhjê jarẽ. ⁹ Jakamã mẽ pahte Apraãw pyræk

ně amnhĩ kaxyw Tĩrtũm kôt pajamaxpěr xwỳnhjaja kot puj mẽ pahpiitã uràk nẽ pamex kumrẽx nẽ papa ho papa.

Tanhmã Tĩrtũm kot mẽ panê pĩ kahpa hã jêt xwỳnh nhĩpêx to hã harẽnh

Rõmãn 4.14, 7.10; Wam Korĩt 15.56

¹⁰ Nẽ koja mẽhõ hamaxpěr o:

—E kot paj finat Mojes kapěr kôt ri amnhĩ nhĩpêx o ri ixpa nhũm Tĩrtũm ja hã ixpumu nẽ amnhĩm inhmex ã ijarẽ nẽ ixto hkra. Anẽ.

No ãm ja kot anhỹr kêt. Tĩrtũm kapěr ã kagà htũm kot ja jarẽnh kot:

Ixte amnhĩm mẽ mex ã mẽ harẽnh kaxyw mẽ kot Mojes kapěr kôt amnhĩ nhĩpêx xwỳnhjaja koja mẽ ãm mẽmoj pixire nẽ hirôp kuhê. Rỳ mẽmoj pixire nẽ hkôt amnhĩ nhĩpêx kêt pa ja hã mẽ omu nẽ hã mẽ homnuj tỳx kumrẽx.

Anhỹr jakamã tanhmã kot pu mẽ amnhĩ to nẽ Mojes kapěr piitã hkôt amnhĩ nhĩpêx nẽ aa ho pixi nẽ hirôp pakuhê hkêt? Nà kot puj mẽ ho anhỹr kêt nẽ. Kot puj mẽ tee ri pamã ja ho anhỹr prãm kaprỳ. Jakamã Tĩrtũm kot amnhĩm mẽ mex ã mẽ harẽnh kaxyw mẽ kot ã amnhĩ nhĩpêx anhỹr mã xwỳnhjaja koja mẽ mex kêt nẽ.

¹¹ Na hte Tĩrtũm mẽ kot finat Mojes kapěr kôt amnhĩ nhĩpêx o mẽ pa hã mẽ omunh xà hkôt mẽ mex ã mẽ harẽnh kêt nẽ. ãm mẽ kot amnhĩ kaxyw hkôt hamaxpěr xwỳnh pixjaja na hte ã mẽ harẽnh anẽ. Kapěr ã kagà htũm kot mẽ harẽnh kot:

Mẽ kot amnhĩ kaxyw ixkôt hamaxpěr xwỳnhjaja na pa hte mẽ mex ã mẽ harẽnh o ixpa. Mẽ tapxipixjaja koja mẽ nhỹrmã Ixkra mẽ wa

ixri mex kumrêx nê htîr tûm nê pa ho pa.
Anê.

12 Nom na htem amnhî kaxyw Tîrtûm mã hamaxpêr pê finat Mojes kapêr kôt amnhî nhîpêx o pa hkêt nê. Mojes kapêr ã kagà kot ja jarênh kot:

Mê kot ixkapêr piitã hkôt amnhî nhîpêx mex o mê
pa xwÿnh pixjaja koja mê htîr tûm nê pa ho
pa. Anê.

13 Tã kot pu mê ãm kapêr o pixire nê hirôp pakuhê hãmri nê mÿrapê pahtîr tûm nê papa hkêt nê. Nê hpãnhã mê kot amnhî xà htÿx kamã hamak tûm xàta hwÿr ma papa. Ja pymaj na pre Krisja ï ho mê pahwÿr wrÿ nê mê pahte amnhî tomnuj mÿrapê mê panê ty. Tîrtûm kot mê pahte amnhî tomnuj mÿrapê tanhmã mê pahto pymaj ã mê panê htyk anê. Jakamã nhûm Tîrtûm mê pahte amnhî tomnuj ã mê pahpumunh kôt mê pakuhpa hã Kraja homnuj nê. Kapêr ã kagà htûm kot ja jarênh kot:

Pï kahpa hã jêt xwÿnhhta na pre Tîrtûm homnuj tÿx
kumrêx. Anê.

*Mê kot amnhî kaxyw Kris kôt mê hamaxpêr
xwÿnhjê jarênh*

14 Tã ã Jejus Kris kot mê panê amnhî nhîpêx anhÿr kukwak ri na pre Tîrtûm kot Apraãw nhîpêx pyrã nê mê ixpê Ijaew pix o mex kêt nê. Mãânên mê apê Ijaew kêt xwÿnhjê ho mex nê. Jakamã koja mēhō. Ijaew ò rÿ Ijaew kêt xwÿnhjê hō amnhî kaxyw Kris kôt hamaxpêr nhûm Tîrtûm hã omu nê ho hkra nê hwÿr Karō mê nhûm kãm axà.

Tĩrtũm kot finat Mojes kukamã mẽ pahto mex ã harẽnh

Rõmãn 3.19-20, 5.20-21, 11.32; Eprêw 6.13-18

¹⁵ E ixkrãmnhwýjaja. Kot paj ixprĩ hã mẽ amã ja jarẽ ka mẽ inhma. Nã koja mẽhõ wa hamẽxkrut nẽ mẽmoj tã axpẽn ma. Pika hã war axpẽn ma rý mẽmoj tã war axpẽn ma. Hãmri nẽ wa hã axpẽn mar pa nhũm ja ãm hãmri nẽ ãm rãhãã. Koja nhãm mẽhõ tẽ nẽ axtem tanhmã harẽnh to hkêt nẽ. ¹⁶ Ja pyrà nẽ na hte ã Tĩrtũm mẽmoj tã amnhĩ jarẽnh anẽ. Na hte mẽmoj jarẽ nhũm arĩ rãhãã. Na hte jarãhã mẽmoj jarẽ nhũm jãã nhũm axtem hijuk ri mẽmoj jarẽnh kêt nẽ. Na hte ãm kapër pýnh nẽ. Tã na pre Apraãw mã hkanrẽhã htãmnhwýjê hõ kukwak ri Apraãw o mex ã amnhĩ jarẽ. Tãmnhwý piitã kukwak ri ho mex ã amnhĩ jarẽnh kêt nẽ. ãm kanrẽhã htãmnhwý Krisja pix kukwak ri ã Apraãw o mex ã kãm amnhĩ jarẽnh anẽ.

¹⁷ E kot paj hpãnhã axtem tanhmã mẽ amã harẽnh to. Na hte Tĩrtũm kot mẽmoj tã amnhĩ jarẽnh xà hkõt tanhmã mẽmoj to ho pa rãhã nẽ. ã na pre finat Apraãw mã kot ho mex ã amnhĩ jarẽnh anẽ. Tã ra hã amgrà pẽ 430 nẽ hapêx nhũm hpãnhã finat Mojes mã kapër. Kot mar nẽ amnhĩ xõ ri Ijaew mã harẽnh o ri mẽ hkõt pa kaxyw. Tã no nhũm ra kot Apraãw mã mẽmoj jarẽnh ta arĩ hã no htýx rãhã nẽ aa ho hamakêtkati hkêt nẽ. Nẽ kot Mojes mã tanhmã kapër toja nẽ Apraãw mã tanhmã kapër toja nhũm hamẽ wa ho hamakêtkati hkêt nẽ. Nhũm wa hamẽ arĩ rãhã ho rãhã. ¹⁸ Tã mẽ ano kupyri o ri mẽ pa xwýnhjaja na htem htýx tanhmã mẽ amã harẽnh to nẽ mẽ amã harẽnh o:

—Kwa kot puj mẽ Mojes kapër kôt amnhĩ nhĩpêx o papa hkêt nê nhũm Tĩrtũm tee ri ja hã mẽ pahpumu nê mẽ pahto mex kêt nê. Anê.

Nom ja kot anhỹr kêt. Kop apu ã kot anhỹr ronhỹx Tĩrtũm ra wam kot tanhmã Apraãw mã kapër tota ra ho hamakêtkati. Nom na hte arĩ kãm hamaxpër rãhã nê ho pigranh nê ho hapêx kêt nê. Na pre Apraãw mã kãm:

Kot kaj amnhĩ kaxyw ixkôt ajamaxpër hã kot paj ato mex kumrêx. Anê.

Tã kot ho mex ã amnhĩ jarênhja arĩ rãhãã. Na hte arĩ mẽ kot amnhĩ kaxyw hkôt hamaxpër xwỹnhjê ho mex nê. Nom mẽ kot Mojes kapër kôt amnhĩ nhĩpêx o pa hã mẽ omunh xà hkôt mẽ ho mex kêt nê. ãm mẽ kot amnhĩ kaxyw hkôt hamaxpër xwỹnh pixjaja na hte mẽ ho mex.

Mo kaxyw na Mojes kapër ã kagà?

Rõmãn 3.20, 5.20, 7.7

¹⁹⁻²⁰ Tã mo kaxyw na Mojes kapër ã kagàja? Nà mẽ pahte tanhmã amnhĩ tomnuj to ho papa hã amnhĩ pumunh nhũm Tĩrtũm kot ã mẽ pahte amnhĩ nhĩpêx anhỹrja nê mẽ pahkurê kaxyw. Na pre Mojes Tĩrtũm nhỹ hã mẽmoj nê mẽ pahkurê. Mẽ pahte axpên pê paxàhkĩnh nê mẽ pahkurê. Nê mẽ pahte axpên mã paxêx o ri papa nê mẽ pahkurê. ã mẽmoj nê mẽ pahkurê anê. Mẽ pahprĩ hã kapër mar nê tãm amnhĩ nhĩpêx o papa kaxyw. Ja kaxyw na pre Tĩrtũm Ijaew kaxyw Mojes mã kapër gõ. Na pre kaxkwa rũm kapër o wrỹk xwỹnhjaja kumrêx kãm harê nhũm kuma nê Ijaew mã hã kagà. Jakamã na htem harênh o: “Mojes kapër” anhỹr o harê.

Tã Apraãw kanrêhã htàmnhwỳ Krisja kormã kator kêt ri nhũm Ijaew Mojes kapêr ma nê hkôt ri amnhĩ nhĩpêx o pa. Tã nhũm Krisja kator o Mojes kapêr o hapêx. Ra Tĩrtũm kot Kris kukamã ho mex ã amnhĩ jarênh xà hã arĩgrota kator mẽ nhũm Mojes kapêr hapêx.

No na pre Tĩrtũm Ijaew mã ujarênh kaxyw tãm mẽ kãm ujarênh kêt nê. Kapêr o wrỳk xwỳnhjê mã na pre harê nhũm mẽ amnhĩ xô ri Mojes mã mẽ kaxyw kãm awjarê. Kot mẽ ô ri mẽ kãm harênh kaxyw. No Apraãw mã na pre Tĩrtũm tãm kapêr. Na pre hwỳr kapêr o wrỳk xwỳnhjê hõ mẽnh kêt nê. Tãm kot kãm kapêr jakamã kapêrja na mex o Ijaew kaxyw Mojes mã kapêr jakrenh.

²¹ Nê na pre Tĩrtũm tanhmã mẽ pamã kapêr o amnhĩrĩt to nê mẽ pamã:

—E kot paj amnhĩ kaxyw ixkôt mẽ ajamaxpêr ã mẽ apumunh kôt pix mã mẽ amex ã mẽ ajarê.

Anhỳr o mẽ pamã kapêr. Tã xà na pre kapêrja nhĩjuk ri axte amnhĩ jarê nê amnhĩ jarênh o:

—E kot paj mẽ ate Mojes kapêr kôt amnhĩ nhĩpêx mex o apa hã mẽ apumunh kôt mẽ amex ã mẽ ajarê.

Anhỳr o mẽ pamã kapêr? Xà na hte mẽmoj jarê nhũm jãã nhũm ra hijuk ri axtem mẽmoj jarê? Nà Tĩrtũm kapêr ãm hpỳnh kênã. Kop ãm mẽ pahte Mojes kapêr kôt amnhĩ nhĩpêx o papa hã mẽ pah-pumunh kôt mẽ pamex ã mẽ pajarênh ronhỳx mẽ pamã:

—Ãm ja pix ã mẽ apumunh kôt kot paj mẽ amex ã mẽ ajarê. Anê.

²² Nom na pre ã kapêr anhÿr kêt nê. Kapêr ã kagà htũm kot ja jarênh o:

Mê apiitã mê ate amnhĩ tomnuj o mê apa xwÿnh na ka mẽ.

Anhÿr jakamã tanhmã kot puj mẽ amnhĩ to nê Mojes kapêr kôt amnhĩ nhĩpêx mex o papa? Mê pahpiitã mẽ pahte amnhĩ tomnuj xwÿnh kênã. Mê pahte kapêr piitã hkôt amnhĩ nhĩpêx kêt jakamã koja Tirtũm ja hã mẽ pahpumunh kôt mẽ pamex ã mẽ pajarênh kêt nê. Koja ãm mẽ pamã kapêr o:

—Kot kaj mẽ amnhĩ kaxyw Jejus Kris mã aja-maxpêr pa ja hã mẽ apumunh kôt mẽ amex ã mẽ ajarê nê mẽ ato ixkra nê mẽ ato mex o ri ixpa. Anê.

Mojes kapêr te kêp Kris xwÿj ri mẽ hamãr xwÿnh pyrãk ã harênh

Rômãn 10.4; Karatas 4.1

²³ Nê kormã Kris kot mẽ pahwÿr wrÿk nê mẽ panê htyk xwÿj ri na pre Ijaew Mojes kapêr ma nê hkôt amnhĩ nhĩpêx o ri pa. Nhũm kapêrja te kot amnhĩm mẽ unênh nhũm mẽ kot hkôt pix mã amnhĩ nhĩpêx o ri pa pyrãk. Na prem Tirtũm kot mẽ mex ã mẽ harênh prãm xàj ãm pix ma nê hkôt amnhĩ nhĩpêx o pa. Nom kapêr piitã hkôt amnhĩ nhĩpêx mex kêt nê. ²⁴ Te mēhprĩre nhũm Mojes kapêr te kêp mẽ hamãr xwÿnh pyrãk. Mēhprĩ jamãr xwÿnhjaja na htem mēhprĩjê pumu nê tãm mẽ kot amnhĩ nhĩpêx kaxyw tanhmã mẽ ahkre hto ho mẽ hkôt pa. Ja pyrã nê na pre Ijaew tãm amnhĩ nhĩpêx o pa kaxyw Mojes kapêr ma nê hkôt amnhĩ nhĩpêx o ri pa. Jejus Kris kutêp ã amnhĩ nhĩpêx anhÿr o ri pa. Tã nhũm Jejus tãm kaxkwa rũm wrÿ pa mẽ ixkwÿj pixjaja mẽ ixkwÿjê rom amnhĩ

kaxyw hkôt ijamaxpêr. Hāmri nhūm Tīrtūm ja hã mē ixpumunh kôt mē inhmex ã mē ijarēnh kurê kumrêx.

Jejus kukwak ri mē pahpê Tīrtūm kra ã mē pajarēnh

Juãw 1.12; Rômãn 8.14; Epes 1.5

²⁵⁻²⁶ Tã ra mē ixte amnhĩ kaxyw Kris kôt ijamaxpêr jakamã na pre Tīrtūm mē ixto hkra pa mē ra te ixpê hkra xàptàr pyràk o amnhĩ nhĩpêx nē kapêr kôt amnhĩ nhĩpêx mex o ri ixpa. Jao Mojes kapêr kaga. Te mēhprĩre ra mē ahkre kamã mē àptàr nē kot mē ahkre xwýnh kaga pyràk. Hāmri pa mē ixpê Tīrtūm kra xàptàrjaja hāmri axte Mojes kapêr kôt amnhĩ nhĩpêx hkêt nē.

²⁷ Tã mē kajaja na ka pre mē ixpyrà nē amnhĩ kaxyw Kris kôt ajamaxpêr nhūm mē akwý kot mē apê Jejus kwý hã mē apumunh kaxyw nhūm mē akrã kumrã. Hāmri ka mē Jejus kot amnhĩ nhĩpêx kôt pix mã amnhĩ nhĩpêx o ri apa. ²⁸ Tã ra mē pahpê Jejus Kris kôt amnhĩ xunhwýr xwýnh jakamã na hte Tīrtūm ahpýnhã ri tanhmã mē pakute hkôt mē pahpumunh kêt nē. Mē pahpê Ijaew rý mē pahpê Ijaew kêt xwýnhjaja. Rý mē pahpê nhãm mē kãm paxàpênh xwýnh rý amnhĩ mã mē paxàpênh xwýnh nhūm hte ja hã mē pahpumunh kôt tanhmã mē pajarēnh to hkêt nē. Rý mē anijê hkôt rý mē inhmyjê hkôt mē pahpumunh kôt tanhmã mē pajarēnh to kêt nē. Âm mē pahte Jejus Kris kôt amnhĩ xunhwýr ã mē pahpumunh kôt pix mã na hte ã mē pahpumunh o pa anê.

²⁹ Nē na pre Tīrtūm Apraãw mã hkanrêhã htàmnhwý Jejus Kris o mex ã amnhĩ jarê. Tã Kris

kêp mẽ panhõ Pahihti jakamã pu mẽ Tĩrtũm noo mã urak nẽ te mẽ pahpê Apraãw tàmnhwỳ pyrak. Jakamã koja Apraãw nhĩpêxta pyrà nẽ mẽ pahto mex rax nẽ.

4

Mojes kapêr te axte mẽ pahpynênh kêt pyrak ã harênh

Rômãn 7.1, 8.14-17; Karatas 3.23

¹ E kot paj axte mẽ amã tanhmã mẽhprĩjê jarênh to ka mẽ inhma. Koja mẽhõ ra hkra mã mẽmo hikukrêx nhõr kaxyw. Hikukrêx nẽ õ pika. Õ mẽmoj piitã õr kaxyw. No nhũm hkraja kormã hprĩre nẽ hamaxpêr mex kêt jakamã nhũm kormã hprêk jamãr o pa. Nhũm hkraja arĩ te kãm àpênh o pa xwỳnh kot amnhĩ nhĩpêx pyrà nẽ amnhĩ krã hkõt ri amnhĩ nhĩpêx o pa hkêt nẽ. Kormã hipêêxà kapêr kõt ri amnhĩ nhĩpêx o pa. Nhũm hipêêxàja kot kãm õ mẽmoj piitã õr kaxyw no ãm kormã hprêk jamã. ² Tã kormã hkraja hprĩre ri nhũm hipêêxà tanhmã amnhĩ to nẽ ty. Nom nhũm hkraja mỳr pê kormã õ mẽmoj o amnhĩptàr kêt nẽ. Kormã hprĩre jakamã nhũm hipêêxà mỳr pê kot kãm hamãr o pa xwỳnhja kormã kãm hamãr o pa. Tã nhũm hipêêxà kot kãm amgrà jarênh xwỳnhhta kato nhũm tãm mẽmoj piitã ho amnhĩptà. Ra àptàr mex nẽ hamaxpêr mex nẽ amnhĩm ho amnhĩptàr pa. ³ Tã Ijaew na prem ã amnhĩ nhĩpêx anẽ. Amnepêm kormã mẽ kot Mojès kapêr kõt ri amnhĩ nhĩpêx o pata ã na prem te mẽhprĩre hamaxpêr kêêta pyrak. Te kormã mẽ àptàr kêt pyrà nẽ jar pika ja kamã mẽ kot amnhĩ nhĩpêx tũm kõt pix mã amnhĩ nhĩpêx o pa. Mẽ kot amnhĩ nhĩpêx tũm te kot amnhĩm

mě unênh nê mẽ kãm ê pyræk o mẽ hipêx nhũm mẽ hkôt pix mã amnhĩ nhĩpêx o ri pa. ⁴ Tã nhũm Tĩrtũm kot Kra hkukamã mẽ pahwỳr mênh xà hã arĩgrota kato hãmri nhũm mẽ pahwỳr kumê nhũm mẽ pahwỳr wrỳ nê mẽ pahpyrà nê mẽhõ nhõhy rũm kato. Nê mẽ pahpyrà nê gaa nê hprêk nê mẽ ixpê Ijaew rom Mojes kapêr piitã hkôt amnhĩ nhĩpêx mex kumrêx o ri pa. ⁵ Jao te kot Mojes kapêr pê mẽ papytâr pyræk o mẽ panhĩpêx pu mẽ hpãnhã pahpê Tĩrtũm kra kaxyw. ⁶ Tã mẽ ixpê Ijaew kwỳjaja nê mẽ apê Ijaew kêt xwỳnh kwỳjaja ra mẽ pahpê Tĩrtũm kra jakamã na pre mẽ pahwỳr Kra Jejus Karõja rê nhũm mẽ pamã agjê. Hãmri nê mẽ pamã kapêr o:

—Ra mẽ apê Tĩrtũm kra jakamã kêt ka mẽ kãm amnhĩ jarênh kaxyw nê kãm: “Pa Papaj” anê. Kêt ka mẽ ã kãm akapêr anê. Anê.

⁷ Jakamã na pu mẽ ra te pahpê mẽ kãm paxàpênh xwỳnh pyræk kêt nê. Ra mẽ pahpê Tĩrtũm kra jakamã na hte mẽ panhĩpêx o te Kra Jejus nhĩpêx pyrà nê mẽ pahto mex nê.

Mojes kapêr kôt mẽ kot amnhĩ nhĩpêx xwỳnhjê jarênh

Sikũn Korĩt 11.3-4; Korosê 2.16-19; Eprêw 6.1; Wam Pêtre 1.14

⁸ Nê amnepê mã kormã mẽ ate amnhĩ kaxyw Jejus kôt ajamaxpêr kêt ri na ka prem Tĩrtũm jarênh mar kêt nê. ãm atỳx ri sãnti mã mex ã harê nê kãm amnhĩ jagrer o ri apa. Nê amã mẽmoj kĩnh nê amã hprãm xàj tanhmã amnhĩ to hwỳr to ho ri apa. Te mẽ kãm mẽ àpênh o mẽ pa xwỳnhjaja kot amnhĩ

nhĩpêx pyrà nê sânti mã tanhmã amnhĩ nhĩpêx to ho ri apa. Nom sântija kêp Tĩrtũm kêt.

⁹ Tã ka prem Tĩrtũm jarênh ma nê hkôt amnhĩ xunhwý nhũm amnhĩ tã mẽ apumu. Tã tãm kot amnhĩ kaxyw mẽ paxunhwýr jakamã kwa mon ka mẽ ra axtem nê akupým sânti hkôt amnhĩ nhĩpêx kaxyw? Nà mẽ ajamaxpêrja mex kêt. Sânti nhĩpêxta tanhmã koja amnhĩ to nê mẽ ato ajuta? ãm mẽ kot ãhkra ho hipêx pix jakamã hihtýxti hã. Amarĩ kuhê xà kamã kuhê ho kuhê xwýnh kênã. Tã te kot akupým amnhĩ kôt mẽ arênh kaxyw pyræk o mẽ anhĩpêx ka mẽ ra axtem nê akupým hkôt amnhĩ nhĩpêx kaxyw. Kwa nà mẽ ã ri amnhĩ nhĩpêx anhýr kêt nê.

¹⁰ Nê na ka htem amnhĩ kukamã ajamaxpêr o:

—Na pre hte Ijaewjaja Mojes kapêr xà hkôt arĩgro hkwý hã axtem tanhmã amnhĩ nhĩpêx to nê mẽmo mytwrý hã tanhmã amnhĩ nhĩpêx to nê mẽmo amgrà hã tanhmã amnhĩ nhĩpêx to. Tã kot paj mẽ uræk nê ã amnhĩ nhĩpêx anhýr o ixpa. Kê Tĩrtũm ja hã ixpumu nê inhmex ã ijarê. Anê.

Kwa mẽ ã ajamaxpêr anhýr kêt nê. Mon ka htem axtem nê ri ã ajamaxpêr anê? Na hte Tĩrtũm ã mẽ pahte amnhĩ nhĩpêx anhýr ã mẽ pahpumunh kôt mẽ pamex ã mẽ pajarênh kêt nê. ¹¹ Na pa ja hã mẽ ajarênh ma nê tee ri mẽ akukamã ijamaxpêr. Te ixte Tĩrtũm kapêr o mẽ ajahkre kaprý ho ri ixpa pyræk.

Karatas nhõ xwýnhjaja kot Pawre ho mex ã mẽ harênh

Wam Korĩt 9.21-23

12 Kwa ixkràmnhwỳjaja. Ixpê Ijaew tâ te ixpê Ijaew kêt pyràk o amnhĩ nhĩpêx o ri mẽ apê Ijaew kêt xwỳnhjê hkôt ri ixpa. Jao Kris kapêr gryk ã mẽ inhĩgêjtjaja kot amnhĩ nhĩpêx kaga nê axte hkôt amnhĩ nhĩpêx kêt nê. Tã kwa mẽ ixpyrà nê ã amnhĩ nhĩpêx anê. Wem ma amnhĩ to amõr gri kêt wehe. Wam ixte mẽ awỳr inhmõrta ã na pa pre mẽ amã Tĩrtũm kapêr jarênh o ri mẽ akôt ixpa ka prem inhma nhũm ja mẽ amã mex nê ka mẽ ja hã tanhmã ixto hkêt nê. 13 Na pa pre ixàà nê mẽ awỳr mõi nhũm ixàja ixto htỳx nê pa tokyx ixkator nê ma akupỹm mẽ arũm inhmõr kêt nê arĩ mẽ amã Tĩrtũm kapêr jarênh o ixpa. 14 Kormã ixà nê tanhmã ixkute htã ka prem ja hã ixpumu nê ixto mex nê ixkamã anhõkre kahak kêt nê. Na ka prem te ixto Jesus Kris nhĩpêx pyràk o inhĩpêx. Nê te ixto Tĩrtũm kapêr o wryk xwỳnh nhĩpêx pyràk o inhĩpêx. 15 Jao mẽ amã ixkĩnh nê ã inhĩpêx anê nê mẽ amã ixto mex pix prãm. Nê nhỹri ixpumu nê ixkamã axukapĩ nê inhmã akapêr o:

—Hêxta waa nê. Anopxàà. Inhmã amnhĩ no kaxàr nê amã õr prãm nom tanhmã kot pa mẽ amnhĩ to nê hkapa nê amã kugõ? Anê.

Nê mẽ amã inhmã mẽmoj mex pix nhõr prãm. Tã ra tanhmã ajamaxpêr to nê axtem nê te mẽ amã ixkĩnh kêt pyràk o inhĩpêx.

Mẽ no kupyrr xwỳnhjaja kot mẽ hamaxpêr o pihkàr ã mẽ harênh

16 Nê na pa pre ãm hãmri mẽ amã Tĩrtũm kapêr jarênh o ri mẽ akôt ixpa. Nom ra mẽ amã mar prãm kêt jakamã na ka mẽ axtem nê inhĩpêx o te ixte mẽ akutã amnhĩ xãm pyràk. 17 Mẽ amã Tĩrtũm kapêr

o mẽ hêx xwÿnhjaja te mẽ kãm mẽ akĩnh pyràk o mẽ anhĩpêx no ãm mẽ kãm akĩnh kêt. Na htem mẽ amex kaxyw tanhmã mẽ amã kapêr to hkêt nê. ãm mẽ ate mẽ mar nê mẽ gryk ã ixkaga nê mẽ hkôt ri amnhĩ nhĩpêx o apa pix prãm xàj na htem mẽ akôt tanhmã mẽ amã hêx to ho pa. ¹⁸ Pa mẽ harênh ma hãmri nê mẽ kamã inhgryk o ã mẽ amã mẽ harênh anhÿr kêt nê. Kojã mēhō mẽ awÿr mra nê ixwakre kamã rÿ inhnoo mã mẽ amã mẽmoj mex jarê nhũm ja inhmã mex nê. No nhũm mẽ amã mẽ hêx xwÿnhjaja axtem nê mẽ ajamaxpêr o pihkàr pix kaxyw na htem mẽ awÿr mra nê mẽ amã ã ujarênh o pa anê.

Pawre kot tee ri mẽ hkukamã hamaxpêr ã harênh

¹⁹ Te mẽ apê ixkra pyràk jakamã na pa hte mẽ ate amnhĩ nhĩpêx ã mẽ apumu nê tee ri ijamaxpêr nê ixkaprĩ htÿx nê. Te nhÿhÿnh ixà htÿx nê ixte amnhĩ xà htÿx kamã ijamak o ri ixpaja pyràk. Rÿ te mẽ hpijagri ho mẽ hikwÿ xwÿnh õhy xà htÿxta pyràk. Mẽ ate Kris kôt amnhĩ nhĩpêx mex o apa hprãm xàj na pa hte ã amnhĩ nhĩpêx anhÿr o ri ixpa. ²⁰ Hêxta waa nê. Kop apu ra mẽ awÿr ixpôx nê mẽ akôt ixpa ronhÿx pa ixkĩnh tÿx kumrêx. Nhÿx pa ra ixprĩ hã mẽ amã ixkapêr ka mẽ inhma. Nê amnhĩ tã inhmã mẽ akĩnh tÿx ã mẽ akamã inhgryk kêt ã ixpumunh kurê kumrêx. No kagà pix kãm ixkapêrja ka mẽ kamã harê nom aprĩ hã inhmar mex kêt nê. Na pa tee ri mẽ akukamã ijamaxpêr o ixkaprĩ htÿx nê ixpa.

Mojes kapêr kôt mẽ kot amnhĩ nhĩpêx xwÿnhjê jarênh

Eprêw 12.18-29

21 Kwa mẽ amã arĩ Mojes kapêr kôt amnhĩ nhĩpêx o ri mẽ apa hprãm xwýnhjaja. Mãn ka mẽ kormã aprĩ hã Mojes kapêr piitã mar par kêt jakamã na ka mẽ amã hkôt amnhĩ nhĩpêx prãm. E pa ixprĩ hã mẽ amã tanhmã harênh to ka mẽ inhma. 22 Nà Tĩrtũm kapêr ã kagà htũm kot finat Apraãw jarênhja. Na pre hkra myja wa hamêxkrut. Prõ Sara kamã ja nẽ kot amnhĩm haprõr nhũm ri kãm àpênh o pa xwýnh Aga kamã ja. 23 Kãm àpênh xwýnh kamã ja na pre mẽ pahpiitã mẽ pahpyrà nẽ amarĩ kato. No hprõ Sara kamã ja. Sara na pre ra hpigêx tỳx nẽ. Ra hkamrô hkêt ryy nẽ pa htã nhũm Tĩrtũm kot wa hkra hkukamã wa kãm ujarênh xà hkôt nhũm Apraãwja htu nhũm wa hkrata kato. Tĩrtũm kot hkukamã wa kãm harênh xà hkôt nhũm kamã hkra nhũm kato.

24-25 Tã wa nita ã wa harênh kot anhỹr. Na pre Tĩrtũm mẽmoj jarẽ. Te ho wa uràk o wa harẽ no ãm hã kuxi nẽ ã wa harênh anẽ. Jakamã ni wa harênhja te kot Tĩrtũm kapêr pijakruuta pyràk. Wam ni Agata te kot hixêt prêk pê Sinai nhĩmõk ã Tĩrtũm kot Mojes mã kapêrta pyràk. Hixêtja pika pê Arap kamã na pre. Jakamã nhũm Tĩrtũm Ijaew kaxyw Mojes mã kapêr nhũm kuma nẽ amnhĩ xõ ri mẽ kãm hã kagà. Tã na hte arĩ jarãhã mẽ hkwyjaja hamaxpêr o:

—E kot paj mẽ panhĩgêt finat Mojes kapêr kôt amnhĩ nhĩpêx o ri ixpa nhũm Tĩrtũm ja hã ixpumu nẽ amnhĩm inhmex ã ijarẽ nẽ ixto hkra.

Anhỹr o hamaxpêr no ãm ã hamaxpêr anhỹr kaprý. ã mẽ hamaxpêr anhỹr xwýnhjaja te mẽ kêp Apraãw mã àpênh xwýnh Aga hkrata pyràk. Nẽ krĩ pê Jerujarẽ kêp Ijaew nhõ krĩ jakamã haxwýja te

kêp Agata pyræk. Nhũm krĩ nhõ xwỳnhjaja haxwỳja te mẽ kêp Aga hkrata pyræk. Na htem htỳx Tĩrtũm kot mẽ omunh nẽ mẽ ho hkra hprãm xàj Mojes kapêr kôt amnhĩ nhĩpêx o pa hã amnhĩ jarênh kaprỳ. Jakamã haxwỳja te mẽ kêp mẽ kãm mẽ àpênh o pa xwỳnh pyræk.

Jejus kôt mẽ kot amnhĩ kaxyw hamaxpêr xwỳnhjê jarênh

²⁶ Nẽ hapu hã Tĩrtũm kapêrta. Apraãw prõ kumrêx Saraja te kêp kaxkwa kamã Jerujarê òja pyræk. Krĩ ja kamã mẽ pa mã xwỳnhjaja te mẽ kêp mẽ kãm mẽ àpênh xwỳnhjê pyræk kêt. Ra mẽ kot amnhĩ kaxyw Kris mã hamaxpêr nẽ hkôt amnhĩ xunhwỳr jakamã na htem hamaxpêr o:

—Ixte amnhĩ kaxyw Kris mã ijamaxpêr nẽ hkôt amnhĩ xãm jakamã na Tĩrtũm ixpumu nẽ amnhĩm inhmex ã ijarê nẽ ixto hkra. Anẽ.

Ãm hãmri na mẽ ã wantajê rom hamaxpêr anẽ. Tã ã mẽ hamaxpêr anhỹr xwỳnhjaja te mẽ kêp Sara hkra pyræk.

²⁷ Tĩrtũm kapêr ã kagà htũm kot ja jarênh kot: E kormã akra hkêt nẽ apa htã kêr ka mãmrĩ akĩnh nẽ ri apa.

Nẽ kormã apijagri hkêt tã kêr ka akĩnh tỳx nẽ ri apa.

Kormã amjên kot akamã hkra hkêt nẽ te kot akaga pyræk tã kot kaj akra nẽ akanrêhã atàmnhwỳ xohtô rax nẽ.

Mẽ ohtô rax o ra amjên kot nhãm hprõ hõ kamã hkrata jakre. Anẽ.

Ã kapêr kot anhỹr o mẽ kot amnhĩ kaxyw Kris kôt hamaxpêr xwỳnhjê hkukamã mẽ ohtô hã mẽ harẽ.

28 E ixkràmnhwỳjaja. Te mẽ apê Ijak kanrêhã htàmnhwỳ pyràk. Koja mēhõ amnhĩ kaxyw Kris kôt hamaxpêr hãmri nê te kêp Apraãw mẽ hprõ Sara wa hkra Ijak kanrêhã htàmnhwỳ pyràk. Na pre Tĩrtũm amnepê mã kormã Ijak kator kêt ri ra h̄kukamã hamaxpêr nê Apraãw mã harê. Nê mẽ papajaja nhũm Tĩrtũm Ijak pyrà nê mẽ pakukamã mẽ pamã hamaxpêr nê amnhĩm mẽ paxunhwỳr ã amnhĩ jarê. Tã ra mẽ ate amnhĩ kaxyw Kris kôt ajamaxpêr jakamã te mẽ apê Ijak kanrêhã htàmnhwỳ pyràk.

29 Nhũm Apraãw kot Aga kamã hkra Ismaewja na pre hprõ kumrêx kamã hkrata pumu nê kãm hkĩnh kêt nê kamã gryk pix o pa. Nê tanhmã hipêx to pê ri haprỳ ho ri hkôt pa. Tã mẽ kot amnhĩ krã hkôt amnhĩ to Tĩrtũm kra hprãm xwỳnhjaja na htem ã mẽ pahte Kris kôt amnhĩ xunhwỳr xwỳnhjê nhĩpêx anhỳr o pa. Na htem Tĩrtũm kot mẽ pahto hkra hã mẽ pahpumu nê Ismaew kot Ijak nhĩpêx pyrà nê mẽ pakamã gryk pix o pa. Nê tanhmã mẽ pahtomnuj to pê mẽ pahto kapêr o ri pa. ³⁰ Tã no ãm kwãr mẽ mãmrĩ ã mẽ panhĩpêx anê. Koja mẽ pahpyrà nê nhỹrmã Tĩrtũm nhõ krĩ hwỳr àpir kêt nê. Tĩrtũm kapêr ã kagà htũm kot mẽ harênh kot:

Na pre Tĩrtũm Apraãw mã kapêr nê kãm: “E kêt ka amnhĩ nê ate haprôr nhũm kot amã àpênh o ri pa xwỳnh mẽ hkrata wa hano. Koja hkrata amỳr pê amnhĩm mẽmoj to àrĩk kêt nê.

Ate aprõ kumrêx kamã akrata pix koja hõja rom amỳr pê mẽmoj piitã ho amnhĩptãr pa.” Anê.

³¹ Tã te mẽ pahpê àpênh xwỳnh kamã hkrata pyràk kêt. Te mẽ pahpê Apraãw prõ kumrêx

kamã hkrata pyræk. Te Tĩrtũm kot Ijak kukamã hamaxpěr pyræk o na pre mẽ pakukamã hamaxpěr.

5

¹ Nẽ Kris kot mẽ pahte amnhĩ nhĩpêx tũm pê mẽ papytår jakamã kwa ixkràmnhwỳjaja. Kêr ka mẽ arĩ ate amnhĩ nhĩpêx tũm kôt amnhĩ nhĩpêx kêt nẽ. Ra Kris kot ja pê mẽ papytår nhũm mẽ paxàmnhĩx ri papa kênã.

Mẽ pahpê Tĩrtũm kra hprãm xàj tanhmã mẽ pahte amnhĩ nhĩpêx to

Juãw 8.32, 8.36; Korosẽ 2.20

² E mẽ inhma. Kot kaj mẽ atõ Tĩrtũm kot ato hkra hprãm xàj amnhĩ my kwryt kà krãhta hã kot kaj mẽ ãm amarĩ ã amnhĩ nhĩpêx anhỹr kapry. Na hte Tĩrtũm ja hã mẽ omu nẽ ãm hã mẽ omu. Kot kaj ã amnhĩ nhĩpêx anẽ nhũm Krisja ãm ate amnhĩ tomnuj mỳrapê anê htyk kapry pyræk o amnhĩ nhĩpêx. ³ Hãmri nhũm Tĩrtũm tee ri ja hã mẽ apumu nẽ te kot ã mẽ amã kapěr anhỹr pyrã nẽ mẽ amã kapěr o:

—E ra amã apê Kris kwỳ hprãm xàj amnhĩ my kwryt kà krãhyr jakamã kot kaj mããnẽn Mojes kapěr piitã hkôt amnhĩ nhĩpêx o ri apa.

Anhỹr o mẽ amã kapěr pyræk.

⁴ Nom kot kaj mẽ atõ amnhĩ kukamã ajamaxpěr o:

—Nà kot paj Mojes kapěr piitã hkôt amnhĩ nhĩpêx o ri ixpa nhũm Tĩrtũm ja hã ixpumu nẽ inhmex ã ijarẽ nẽ ixto hkra kãm ga. Anẽ.

No ãm ja kot anhỹr kêt. Na hte Tĩrtũm ã mẽ pahte amnhĩ nhĩpêx anhỹr ã mẽ pahpumunh kôt

mě pahto hkra hkêt nê. Jakamã kot kaj mẽ ã amnhĩ nhĩpêx anê nê te ate Kris kutã amnhĩ xãm pyræk nhũm Tĩrtũm ato mex kêt nê. ⁵ Nom kot ka mẽ axtem ajamexpêr o:

—Ra ixte amnhĩ kaxyw Kris kôt ijamexpêr nê hkôt amnhĩ xãm jakamã koja Tĩrtũm hã ixpumu nê inhmex ã ijarê. Karõ ra kot ã inhmã ja ho amnhĩrĩt anhỹr kênã.

Anhỹr o ajamexpêr. ãm hãmri ã mẽ ajamexpêr anhỹrja. ⁶ Jakamã mẽ pahpê Kris kôt amnhĩ xunhwỳr xwỳnhjê kamã ra mẽ kot amnhĩ my kwỳt kà jakàr xwỳnhjaja nhũm mẽ pahkwỳjaja ã amnhĩ nhĩpêx anhỹr kêt nê. Tã nhũm Tĩrtũm ja hã mẽ pahpumu nhũm ja tanhmã kêp kute hkêt. Na hte mẽ pahte amnhĩ my kwỳt kà jakàr ã mẽ pahpumu nê ãm hã mẽ pahpumu. No kot pu mẽ Jesus Kris kôt amnhĩ nhĩpêx mex o ri papa. Nê amnhĩ kaxyw hkôt pajamexpêr tỳx o ri papa. Nê mẽ pamã axpên kĩnh pê tãm ri axpên nhĩpêx o ri papa. Ja na kêt Tĩrtũm kãm hprãm.

⁷ Ra mẽ ate Kris kôt amnhĩ nhĩpêx mex o ri apa htã nhũm mẽ hêx xwỳnhjaja mẽ awỳr mra nê tee ri ã mẽ ate amnhĩ nhĩpêx anhỹr ã mẽ apumu nê tanhmã mẽ amã Tĩrtũm kapêr o hêx to. Ka mẽ ama nê axte Tĩrtũm kôt amnhĩ nhĩpêx mex hkêt nê. ⁸ No ãm ã mẽ kot mẽ amã mẽ ujarênh anhỹr xwỳnhjaja na pre Tĩrtũm mẽ awỳr mẽ rênh kêt nê. Tĩrtũm kot amnhĩ wỳr mẽ awỳr xwỳnh kênã kot kêt axtem nê mẽ awỳr kapêr o mẽ amã hêx o mẽ pa xwỳnhjê rê.

⁹ Nê koja mēhõ pixi nê tanhmã amnhĩ tomnuj to nhũm mẽ piitã ja hã omu nê uræk nê kãm tanhmã amnhĩ tomnuj to hprãm. ¹⁰ No kêt mẽ apê Kris kwỳ

na ka mẽ. Ixte ja hã mẽ apumunh mex. Kot kaj mẽ axte ixkapêr ma nê akupÿm Kris kôt amnhĩ nhĩpêx mex o ri apa. Nà kot kaj mẽ ã amnhĩ nhĩpêx anê nê axte mẽ kot mẽ apê àmnâr xwÿnhjê kapêr mar nê mẽ hkôt amnhĩ nhĩpêx kêt nê. Koja Kris mẽ atã mẽ homnuj tÿx kumrêx nhũm mẽ rĩ amnhĩ pumu.

Pawre kot mẽ kot amnhĩ jakàr ã mẽ kãm karõ hkêt ã harênh

¹¹ Nê na hte Tirtũm kapêr o mẽ hêx xwÿnhjaja tanhmã mẽ amã ixto hêx to ho pa. Ixte mẽ kãm Tirtũm kot mẽ ho hkra kaxyw mẽ kot amnhĩ my kwryt kà jakàr ã mẽ kãm karõ hã ixto ri hêx o pa. Nom ixte anhÿr kêt ixkràmnhwÿjaja. Kop apu ixte mẽ kãm ja hã karõ ho ixpa ronhÿx Ijaew krãhtũmjaja ja hã ijarênh ma nhũm ja mẽ kãm mex nê nhũm mẽ axte Kris ã tanhmã inhĩpêx to hkêt nê. Nom ixte ja hã mẽ kãm karõ hkêt. ãm ixte mẽ kãm Kris kot mẽ panê pĩ kahpa hã htyk jarênh pix mÿrapê na htem ixkamã gryk nê.

¹² Hêxta waa nê. Mẽ kot mẽ amã hêx o pa pê mẽ ajamaxpêr o pihkàr xwÿnhjaja kop mẽ ãm mẽ anhõ krĩ rũm hapôx nê ma nhÿhÿm hapêx ronhÿx pa ixkĩnh tÿx kumrêx.

Mẽ pahte axpên to mex o papa hã mẽ pamã karõ Wam Korît 13; Eprêw 13.3, 13.16; Wam Pêtre 1.22; Wam Juãw 3.11

¹³⁻¹⁴ Kwa ixkràmnhwÿjaja. Nà na pre Kris amnhĩ kaxyw mẽ parê. Axte mẽ pahte amnhĩ nhĩpêx tũm kôt amnhĩ nhĩpêx kêt kaxyw. Ra kot ã mẽ pahte amnhĩ nhĩpêx anhÿr pê mẽ papytâr jakamã kêr ka mẽ amnhĩ tã ja ma nê axte atÿx ri amã hprãm xà hkôt tanhmã amnhĩ nhĩpêx to ho ri apa hkêt nê.

Mě ãm amã axpën kïnh pix o ri axpën kôt apa. Ně nhãm mẽ hipêx o te ka amã amnhĩ tã ma pyræk o mẽ hipêx. Jao mẽ piitã tãm mẽ hipêx o ri apa. Kot kaj mẽ ã amnhĩ nhĩpêx aně ně te mẽ ate wam Tĩrtũm kapěr piitã hkôt amnhĩ nhĩpêx pyræk. ¹⁵ No kot kaj mẽ axtem ně axpën kãm axopré ho ri apa hãmri ně te ra mẽ ate axpën to ajapêx par o amõr pyræk o amnhĩ nhĩpêx. Te mry xopré kot axpën par o pata pyræk. Kwa mẽ ã amnhĩ nhĩpêx anhÿr hkêt ně. Mě ãm axpën to mex pix ně mẽ axpën kãm axukaprĩ ho ri axpën kôt apa.

Mě pahte amnhĩ nhĩpêx nyw jarěnh

Matêwre 26.41; Rõmãn 8.1-11

¹⁶ Ně kwa kêr ka mẽ amnhĩ to Tĩrtũm Karõ wÿ kê mẽ amã mẽ ate amnhĩ nhĩpêx nyw jagjê ka mẽ axte ate amnhĩ nhĩpêx tũm kôt amnhĩ nhĩpêx hkêt ně. ãm mẽ ate amnhĩ nhĩpêx nyw kôt pix mã mãn amnhĩ nhĩpêx o ri apa. ¹⁷ Tĩrtũm Karõ kot amnhĩ nhĩpêxja ně mẽ pahte amnhĩ nhĩpêx tũmja wa kot axpën pyræk kêt. Te wa kot axpën kutã amnhĩ xãm ně wa pijapu pyræk. Jakamã kot puj mẽ pahte amnhĩ nhĩpêx tũm o amnhĩ nhĩpêx ně Tĩrtũm Karõ mã hprãm xà hkôt amnhĩ nhĩpêx hkêt ně. ¹⁸ No kot puj mẽ Tĩrtũm Karõ hkôt amnhĩ nhĩpêx ně ra jar pika ja kamã mẽ kot amnhĩ nhĩpêx kôt ri amnhĩ nhĩpêx kêt ně. Ra axtem mẽ pahte amnhĩ nhĩpêx nyw o amnhĩ nhĩpêx. ¹⁹ Jar mẽ kot amnhĩ nhĩpêx tũmta mex kêt. Ra mẽ piitã mẽ kot ja pumunh mex.

Na htem htÿx ri hkwyjê kamã hpijaãm kêt o pa.
Jao mẽmyjaja hprõ kuhpa hã nhãm mēnijê ho amnhĩkati.

Nhũm mẽ hprōjaja mẽ mjên kuhpa hã nhãm mẽmyjê ho amnhĩkati.

Nê mẽmy hkwỳjaja axtem nê mẽmyjê hkwỳ ho amnhĩkati.

Nê mẽni hkwỳ haxwỳja axtem nê mẽnijê hkwỳ ho amnhĩkati.

²⁰ Nê mẽ kãm mẽmoj mẽ hikukrêx japê htỳx o kãm Tĩrtũm kĩnh jakre.

Nê mẽmoj kaxyw ma wajaga hwỳr amnhĩ to pa.

Nê hkwỳjê kamã oprê ho ri pa.

Nê mẽmoj tã axpẽn kãm gryk pix nê.

Nê mẽmoj to axpẽn pê õxỳ nê.

Nê mẽmo mỳrapê axpẽn pê anhrà nê amỳm ahpỳnhã ri pa.

²¹ Nê mẽmoj tã axpẽn kamnhĩx rãhã ho ri pa.

Nê axpã nê mẽ grer kãm ri axpẽn kãm hpijaàm kêt o ri pa.

Ã na htem mẽ kot amnhĩ nhĩpêx tũm kôt amnhĩ nhĩpêx o ri mẽ pa xwỳnhjaja amnhĩ nhĩpêx anê.

Ã mẽ kot amnhĩ nhĩpêx anhỳr xwỳnhjaja koja mẽ Tĩrtũm nhõ krĩ hwỳr gjêx kêt nê. Ra ixte mẽ amã ja jarênh tã pa axte mẽ amã harê. Mẽ ate hã ano htỳx rãhã ho ri apa kaxyw. ²² No mẽ kot amnhĩ nhĩpêx nywja axtem na.

Tĩrtũm Karõ hkôt mẽ kot amnhĩ nhĩpêx nyw o amnhĩ nhĩpêx xwỳnhjaja na htem axtem kãm axpẽn kĩnh nê.

Nê hkĩnh nê ri hamakêtkati nê àmnhĩx ri axpẽn kôt pa.

Nê gryk tokyx anhỳr hkêt nê. ãm axpẽn to mex pix o ri axpẽn kôt pa.

Nê tãm axpẽn nhĩpêx.

Ně kot mẽmoj tã amnhĩ jarěnh xà hkôt tanhmã mẽmoj to.

²³ Ně axpěň mã kapěr mã hprĩ ho ri axpěň mã kapěr.

Ně mẽmoj punuj piitã nê amnhĩ to htỳx o ri pa.

Ã na hte mẽ kot Tĩrtũm Karõ hkôt amnhĩ nhĩpêx o mẽ pa xwỳnhjaja Karõ nhỹ hã amnhĩ nhĩpêx nyw o amnhĩ nhĩpêx anhỹr o pa. Jao mããněn Mojes kapěr kwỳm ri amnhĩ nhĩpêx hkêt nê. Jakamã koja mẽhõ mẽ pahte amnhĩ nhĩpêx nyw nê tanhmã mẽ pahkurê hto hkêt nê. ²⁴ Tã mẽ pahpê Jejus Kris kwỳ jakamã na pu mẽ pahte amnhĩ nhĩpêx tũmja nhĩpêx o te mẽ pahte amnhĩ nê hpĩr pyrà nê axte hkôt amnhĩ nhĩpêx kêt nê.

Tĩrtũm Karõ hkôt mẽ pahte amnhĩ nhĩpêx ã mẽ pamã karõ

Epes 4.23-24; Korosẽ 3.10

²⁵ Tã ra Tĩrtũm Karõ kot mẽ pahto hkra jakamã kwa kêr pu mẽ ãm kôt pix mã amnhĩ nhĩpêx nyw o amnhĩ nhĩpêx o ri papa. ²⁶ Kot puj mẽ ã amnhĩ nhĩpêx anê hãmri nê mẽmoj tã mẽ pahkwỳjê mã amnhĩ to jarkrar o ri papa hkêt nê. Kot puj mẽ ã amnhĩ nhĩpêx anê nhũm mẽ pakamã gryk nê. Jakamã kêr pu mẽ ã amnhĩ nhĩpêx anhỹr o ri papa hkêt nê.

6

Mẽ pahte tanhmã axpěň to ajuta hto hã mẽ pamã karõ

Matêwre 18.15-17; Rukre 17.3-4; Sikũn Tesarõn 3.14-15; Xiakre 5.19-20

1-3 Kwa ixkràmnhwýjaja. Mě apê Tĩrtũm Karõ hkõt amnhĩ nhĩpêx o ri mẽ apa xwýnhjaja. Koja Kris kõt akwýjê hõ tanhmã amnhĩ tomnuj to ka mẽ ja hã omu nê ã amnhĩ nhĩpêx anhýrja nê kãm akapêr. Nom kêr ka mẽ kamã agryk kamã kãm tanhmã nê hkêt nê. ãm kãm akapêr mã aprĩ ho kãm akapêr nê akupým tãm ãm. Nom kwa kêr ka mẽ amnhĩ pumunh mex nê uràk nê ã amnhĩ tomnuj anhýr kêt nê.

Kot ka mẽ atõ ã kot amnhĩ nhĩpêx anhýr ã omu nê ãm omu nê nê tanhmã kãm akapêr to hkêt nê. Nê ajamaxpêr o:

—Tk. Kwār mãmri ã amnhĩ nhĩpêx anê. Pa ja nê tanhmã kãm ixkapêr to hkêt nê. Kurom ixte amnhĩ nhĩpêx mex o ri ixpa kênã.

Anhýr o ajamaxpêr japêr. Kwa mẽ ã ajamaxpêr anhýr kêt nê. Kot kaj mẽ ã ajamaxpêr anê nê nê kãm akapêr kêt nê hãmri nê te ate amnhĩ to mex ã amnhĩ jarênh kaprý pyràk.

Nê kêr ka mẽ axpên to ajuta mex o ri axpên kõt apa. Jao Kris kõt amnhĩ nhĩpêx mex nê.

4-5 Nê na htem piitã amnhĩm àpênh pix tãnopxar o pa. Jakamã kêr ka mẽ amnhĩ tãnopxar pê tãm amnhĩ nhĩpêx rãhã ho ri apa. Hãmri nê ja hã amnhĩ pumu nê akĩnh nê. Nom kwa kêr ka mẽ ate amnhĩ nhĩpêx mex o akwýjê jakrenh ã mẽ kãm amnhĩ to jarkrar o ri apa hkêt nê.

6 Nê kêr ka mẽ kot Tĩrtũm kapêr o mẽ ajahkre xwýnhjê ho mex nê mẽ kãm mẽmoj nhõr o ri apa.

7 Koja Tĩrtũm nhýrmã mẽ pahtĩr ri mẽ pahte amnhĩ nhĩpêx ã mẽ pahpumunh kõt tanhmã mẽ pajarênh to. Hãmri pu mẽ tee ri amnhĩ kukamã

pajamaxpêr nom amnhĩ nê tanhmã kãm paxêx to hkêt nê. Koja mēhõ kãm amnhĩ to hêx nê te tãm kot amnhĩ mã hêx pyræk nom kot puj mẽ Tĩrtũm mã amnhĩ nê tanhmã paxêx to hkêt nê. ⁸ Jakamã kot kaj mẽ amnhĩ krã hkôt tanhmã ri amnhĩ nhĩpêx to rãhã ho apa hãmri nê nhỹrmã ty nê Tĩrtũm pê awry rax ã ri apa. Nom kot kaj mẽ Tĩrtũm Karõ mã hprãm xà hkôt pix mã amnhĩ nhĩpêx nê nhỹrmã ty nhũm Tĩrtũm akupỹm ato atĩr ka kuri amex nê ajamakêtkati atĩr tũm nê ri apa ho apa.

*Mẽ pahte axpẽn to mex rãhã hã mẽ pamã karõ
Atre 20.35; Wam Korõt 15.58; Xitre 3.14; Eprêw
13.3, 13.16; Xiakre 1.27*

⁹ Jakamã kwa kêr ka mẽ arĩ tãm ri amnhĩ nhĩpêx nê tãm axpẽn nhĩpêx o ri axpẽn kôt apa nê jam anhũrer kêt nê. Mẽ ã amnhĩ nhĩpêx o ri apa anhỹr rãhã ty nhũm Tĩrtũm nhỹrmã ja hã mẽ ato mex rax nê. ¹⁰ Tã kêr pu mẽ arĩ Kris kôt pahtõjê ho mex rãhã ho ri papa. Nom mẽ tapxipixjê ho mex kêt nê. Pu mẽ mẽ piitã mẽ ho mex o axpẽn pyræk.

¹¹ E ixte mẽ amã kagà nhĩpêx nê mēnh nhũm mẽ ate ja hã ixpumunh kaxyw kot paj pam kagà jatur xà hã inhĩhkra ho inhĩxi nhĩpêx ka mẽ ixte inhĩxi hã kagà rũnhtita pumu.

*Jejus kot mẽ panê htyk ã Pawre kãm harēnh prãm
ã harēnh
Wam Korõt 1.22-24, 2.1-2*

¹² Nê mẽ amã Tĩrtũm kapêr o mẽ hêx xwỳnhjaja na htem hamaxpêr o:

—Nà kot paj Karatas nhõ xwỳnhjê mã Kris pĩ kahpa hã htyk ã harēnh o ri ixpa hkêt nê. Kot pa anê nhũm mẽ ixpê Ijaew kwỳjaja ja hã inhma nê

hã tanhmã inhîpêx to. Ja pymaj kot paj mẽ kãm tanhmã harênh to hkêt nê. Kot paj ãm mẽ kot amnhĩ my kwryt kà jakàr pix ã mẽ kãm karõ kê mẽ ixkapêr xà hkôt ã amnhĩ nhîpêx anê. Pa hã mẽ omu nê ma ixkwÿjê mã mẽ hã amnhĩ to jarkrar o ri ixpa. Anê.

¹³ Te mẽ kot finat Mojes kapêr kôt ri amnhĩ nhîpêx pyræk tã no na htem ã amnhĩ nhîpêx anhÿr kêt nê. Ra mẽ kot amnhĩ jakàr tã no ãm Mojes kapêr piitã hkôt amnhĩ nhîpêx hkêt nê. ãm hkwy hkôt pix mã amnhĩ nhîpêx o pa. Nom kot kaj mẽ ama nê mẽ uræk nê amnhĩ jakà nhũm mẽ ja hã mẽ apumu nê hkĩnh nê. Nê ma ri mẽ hkwyjê mã mẽ atã amnhĩ to jarkrar o ri pa nê mẽ kãm:

—E Karatas nhõ xwÿnhjaja na pa prem mẽ kot amnhĩ my kwryt kà jakàr ã mẽ kãm karõ nhũm mẽ inhma nê mẽ pahpyrà nê ã amnhĩ nhîpêx anê. Anê.

¹⁴ No pa na pa hte ã mẽ kãm mẽmoj tã karõ anhÿr o ri ixpa hkêt nê. ãm Tĩrtũm kot mẽ pahto hkra kaxyw mẽ panhõ Pahihti Jejus Kris kot mẽ nê htykja pix na pa hte mẽ kãm harê. Ra kot inhnê htyk jakamã te pa ixte kuri ijêt nê ixtyk pyræk. Jakamã ra jar pika ja kamã mẽ kot amnhĩ nhîpêxja te ixpê htyk nê hapêx pyræk pa axte hkôt amnhĩ nhîpêx kêt pyræk.

¹⁵ No mẽ kot amnhĩ my kwryt kà jakàr xwÿnhjaja nê mẽ kot amnhĩ jakàr kêt xwÿnhjaja na hte Tĩrtũm ja hã mẽ omu nê ãm mẽ omu. ãm mẽ pahte amnhĩ nhîpêx nyw o amnhĩ nhîpêx o ri papaja pix na kãm hprãm. ¹⁶ Kot kaj mẽ ã amnhĩ nhîpêx anhÿr o ri apa nê apê Tĩrtũm kra mex nhũm mẽ ato mex rax

ně. Ně mẽmoj to mẽ akutã nojarêt rãhã ně. Ka mẽ axàmnhĩx ajamakêtkati ně ri apa ho apa.

¹⁷ Ně na prem Kris ã ixtak rax ně nhũm ixkatut ã ixtak xà arĩ rãhã ně pa hte hã ixpa. Ixte Jejus Kris mã tanhmã amnhĩ nhĩpêx to xwỳnh ã ixto amnhĩrĩt xà na. Jakamã kê mẽhõ axte Jejus kot mẽ awỳr inhmẽnh ã tee ri ixpumu ně tanhmã hã ixkukjêr to hkêt ně.

¹⁸ E ixkràmnhwỳjaja. Kê Pahihti Jejus Kris mẽmoj to mẽ akutã nojarêt ně mẽ ato mex rãhã ho pa. Nà koja mẽ ato aně.

Ãm ja pix na hapêx. Ixpê Pawre na pa ã mẽ amã kagà nhĩpêx ně mẽ awỳr mẽnh aně.

Tĩrtũm kapēr ã kagà nyw
New Testament in Apinayé (BR:apn:Apinayé)

copyright © 1999 Wycliffe Bible Translators, Inc.

Language: Apinayé

Translation by: Wycliffe Bible Translators, Inc.

Apinayé [apn], Brazil

Copyright Information

© 1999, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Apinayé

© 1999, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 11 Nov 2022 from source files
dated 29 Jan 2022

383a4e22-34cd-505f-9cc2-2f9921e7aa9f